

Inatsisartut aalajangiiffigisassaattut siunnersuut tassalu Naalakkersuisut Island-imi kalaallit aallartitaqarfimmik pilersitsinissamut peqquneqassasut, pitsaasumik sanileriinerup ineriartornera qulakkeerniarlugu aamma Kalaallit Nunaannut inuiaqatigiinnullu kalaallinut qulakkeerunniarlugu Island-imit suleqatigiinnermi sapinngisamik annertunerpaamik iluanaaruteqarnissaq pitsaaquteqarnissarlu.

(Inuussutissarsiornermut, Suliffeqarnermut, Niuernermet, Nukissiuuteqarnermut Nunanullu Allanut Naalakkersuisoq)

Saqqummiussissut

(Inuussutissarsiornermut, Suliffeqarnermut, Niuernermet, Nukissiuuteqarnermut Nunanullu Allanut Naalakkersuisoq)

Siullermeerneqarnera

Aalajangiiffigisassatut siunnersuut manna Naalakkersuisut sinnerlugit saqqummiussinnaagakku nuannaarutigaa.

Soorlu naalakkersuisooqatigiinnissamik isumaqatigiissummi ersereersoq Kalaallit Nunarput nunanut sanilerisatsinnut qaninnernut naalakkersuinikkut attavinnik pilersitsisussaavoq.

November 2013-imi Island-ip aamma Kalaallit Nunaata akornanni ataatsimoortumik nalunaarutip atsiorneqarneratigut, nunat marluusut akornanni Island-imit suleqatigiinneq ukiuni kingullerpaani pitsanngortinneqarsimasorujussuuvog, oqartussaaffiit suleqatigiiffigineqarsinnaasut sunaassuserneqarsimapput aalajangersimasumillu suleqatigiinneq oqartussaaffitsigut arlalitsigut pilersinneqarsimalluni. Tamatuma ukiorpassuarni Nunani Avannarlerni Killerni, Nunani Avannarlerni Siunnersuisooqatigiinni aamma Nunani Avannarlerni Ministerinut siunnersuisooqatigiinni suleqatigiinnerup nanginnerivaa.

Ataatsimoortumik nalunaarutikkoortumik Islandimik pitsaasumik oqaloqatigiinnerit pilersinneqarsimapput ilaatigut ukiumoortumik atortuulersitsiniarluni ataatsimiinnerit aqutiga-lugit, kisianni piviusunik aalajangersimasumillu suleqatigiinnerit siuarsarneqarnissaanni nalilerneqarpoq pisariaqassasog Islandimut attaveqarnermi ujartuinerusumik toqqaannarerusumillu immikkoortumik pilersitsinissaq.

Issittumi aamma nunani avannarlerni suleqatigiinneq Island-imi nunani allani naalakkersuinikkut pingaartinneqarnerpaat ilagaat, Island-imilu naalakkersuinikkut siamasissumik isumaqatigiissutigalugu isumaqatigiissutaavoq, Issittoq sulii pingaarnepaasoq tassunga ilanngullugu Kalaallit Nunaanit suleqateqarneq. Tamanna ilaatigut pingaartumik oqaatigineqarpoq 2013-mi Nuummi Island-imiut Generalkonsulateqarfiannik pilersitsinermi. Sorsunnersuup aappata kingorna Kalaallit Nunaanni Island-ip Generalkonsulatianik ammaaneq aallartitaqarnikkut sinniisoqarfiit siullersaraat nunallu marluk suleqatigiinnerinik ineriartortitsinermi alloriarnerit pingaarnersaralugu. Island-imit naatsorsuutigineqarluinnarpoq taamatuttaaq Kalaallit Nunaat Island-imi sinniisuutitaqarfimmik pilersitsisassasog, tamannami aallartitaqarnikkut ileqqusut ilagisarmassuk.

Reykjavikimi sinniisoqarneq Naalakkersuisunit allaffissornikkullu pingaartitanut, nukissanut piginnaasanullu naapertuuttuussaaq Islandimillu suleqateqareermik ingerlatsiinnarnissamut iluaqutaassalluni kiisalu Islandimut naalakkersuinikkut niuernikkullu attaveqarnermut pingaa-

rutilinnik ineriartortitseqqinnissamut nukittorsaanissamullu iluaqutaassallutik, tamannalu Kalaallit Nunaannut aningaasaqarnikkut iluaqusiissasoq naatsorsuutaavoq.

Taamaasilluni Reykjavik-imi sinniisoqarfik Naalakkersuisut aamma allaffissornikkut ingerlatsisut pingartitaannut, nukissaanut piginnaasaannullu naapertuullutillu atassuserneqassasut peqataasinnaallutillu Island-imit suleqatigiinnerit pioreersut aserfallatsaalinissaannut, kiisalu peqataaqataassalluni Island-imut pingaarutilittut naalakkersuinikkut niuernikkullu attaveqarnerit ineriartorteqqinnissaannut nukittorsarnissaannullu, tamakku naatsorsuutigineqarput Kalaallit Nunaannut inuiaqatigiit aningaasarsiorneratigut iluaqusiisinnaasutut.

Taamatut oqaaseqarlunga siunnersuut Inatsisartuni oqaluuserisassanngortippara.